

Rakyat diminta utamakan kestabilan dan keselamatan

KUALA LUMPUR 11 Feb. — Presiden MCA Datuk Seri Dr. Ling Liong Sik dalam perutusan Tahun Baru Cina yang akan disambut Selasa ini berkata rakyat kini lebih sedar betapa pentingnya kestabilan, keharmonian dan keselamatan dalam kehidupan harian dan bagi pembangunan negara.

"Pemikiran rakyat telah banyak berubah sejak insiden 11 September dan sokongan rakyat kepada kerajaan Barisan Nasional (BN) yang mengamalkan prinsip-prinsip sederhana dan bertolak ansur semakin meningkat," katanya.

"Menurut kepercayaan kaum Cina, Tahun Kuda melambangkan kecergasan, kemajuan dan kejayaan. Saya yakin semua ini akan dapat dicapai untuk negara kita dan diri sendiri dengan usaha yang gigih dan semangat perjuangan yang tinggi," katanya.

Kemenangan BN dalam pilihan raya kecil Indera Kayangan bulan lepas membuktikan rakyat menyokong kerajaan pimpinan Datuk Seri Dr. Mahathir Mohamad

yang mengamalkan dasar liberal dan sederhana.

Dr. Ling berkata semangat perpaduan di kalangan pemimpin dan anggota MCA semasa pilihan raya kecil itu harus dikekalkan untuk mengatasi segala masalah dalam parti dan untuk membolehkan agenda politik MCA mendatangkan faedah kepada negara dan rakyat.

Sambil mengucapkan Se-

lamat Tahun Baru Cina kepada semua rakyat Malaysia, beliau berharap rakyat akan kunjung mengunjungi dan menghadiri majlis rumah terbuka dalam suasana harmoni itu untuk memperkukuhkan lagi perpaduan dan integrasi rakyat.

Sementara itu, Presiden Gerakan Datuk Seri Dr. Lim Keng Yaik dalam perutusannya pula berkata rakyat

UM 1 1 FEB 2002

Malaysia perlu terus mengutamakan perpaduan, keamanan serta keharmonian dan perlu memastikan unsur-unsur pelampau tidak bertapak di negara ini.

Beliau yakin majoriti rakyat Malaysia akan mempertahankan formula kejayaan Malaysia.

Semasa rakyat Malaysia menyambut satu lagi tahun baru dalam kalendar Cina, beliau berkata mereka juga perlu berusaha mengurangkan perbezaan antara mereka dan menumpukan pada usaha-usaha memperkukuhkan ekonomi.

Presiden Parti Progresif Penduduk (PPP) Senator Datuk M. Kayveas berkata, rakyat Malaysia harus bersyukur kerana dapat menyambut perayaan Tahun Baru Cina dalam suasana harmoni.

Rakyat Malaysia juga harus berbangga dengan perpaduan kaum yang menjadi tonggak kejayaan negara selama ini dan rakyat bebas merayakan hari kebesaran masing-masing dengan selamat tanpa rasa bimbang.